



ル 5
3150
9



門 儿 5
3150
卷 9

黔南識略卷十二

鎮遠府

貴州巡撫長白愛必達撰

鎮遠府在貴州省會東北四百八十里禹貢荊州荒
裔秦屬黔中郡漢屬武陵郡唐屬思州初尋置舞州
又置獎州後沒于蠻宋初為羈縻州政和中復置思
州元初置鎮遠沿邊溪洞招討使司于豎眼大田溪
洞蠻地尋改為鎮遠府屬思州軍民安撫司明洪武
五年改為鎮遠州隸湖廣行省永樂十一年仍于州
置鎮遠府隸貴州布政司正統三年省州入府

黑百詳田卷一
國朝因之領台拱同知清江通判黃平一州鎮遠施秉
天柱三縣轄貴東道設知府一教授一訓導一經歷
一其境東至思州青谿縣界三十里西至府屬施秉
縣界七十里由施秉抵黃平州爛橋界三十五里南
至黎平府屬界一百二十五里北至石阡府界八十
里東南至府屬之功水九十里又東南至府屬天柱
縣一百八十里由天柱抵湖南靖州界一百里由天
柱東抵湖南會同縣界八十里西抵黎平府屬滄洞
司界六十里南抵滄洞司界八十里北抵湖南晃州
界一百里又西南抵滄洞司界一百里東西延袤四

百餘里西北至石阡府界八十里東北至石阡府界
四十里南至黃平州界七十里西南至府屬之台拱
一百三十九里由台拱南抵丹江廳轄差提寨一百
五十里西南抵黃平州崖門司一百一十里府西南
至所屬之丹江一百九十里由清江東抵黎平府高
洞寨界一百二十五里南抵黎平府古州朗洞寨界
一百一十五里東南抵黎平府開泰縣苗光寨界一
百三十里南抵都勻丹江昂刁寨界一百一十五里
南北延袤五百餘里至
京師七千二百六十里山川阨塞水陸交衝嘉靖中

黔南論田卷十二
知府田瑛議曰鎮遠乃雲貴往來必由之所而所屬
邛水施秉等司縣又與洪江一帶生苗接踵故鎮遠
者雲貴之門戶也邛水施秉者鎮遠之襟喉也欲通
雲貴當守鎮遠欲守鎮遠宜經營邛水施秉等司縣
此形勢之可考事理之必然也城倚山枕河前明正
德中生苗劫掠知府程燦于治西木家灣跨江據崖
築石城禦之共堞口七十有六萬歷二十一年苗襲
郡治巡按馬奕捐貲檄知府張守讓于莫字灣舊城
外要隘處所增築護城隄屬之山以山爲城兩山凹
處壘石塞之今舊城壘石猶存府署後石屏山舊有

萑菜坪民居其上乾隆二年建城時納萑菜坪于城
內計長四百四十四丈門四水關一橋洞一礮台六
石屏山端立如屏山半有石竇每水色出如虹江必
溢居民卜此以避水山右有路屈曲名九曲岡龍頭
山在府署對河高出眾山蜿蜒如龍峰頂雲生則雨
至蓋鎮山也壽星崖在東關外中河山在城東兩水
夾流礮砮特立石壁鐫有楚橋風順四字五老山在
總兵署後五峰聯絡如相拱揖平昌山在城西三里
方輿紀要載嘉靖三十年議者言府治前逼大江後
逼高山參錯廣輪丈不盈百縱使築城寇自高臨卑

勢難固守迤西三里地名平昌高爽饒衍可容萬家後山如圭如笏前江環繞如拖練然四圍諸山皆如龍翔馬馳拱揖相向宜于此設立城池但地連鎮遠衛教場宜相視地形易置否則仍舊址爲城而于江之南岸築土城爲縣治其說未行也西峽山在城西十里山勢若樓臺有飛瀑挂若輕綃石崖山大小有二俗呼崖門山大崖山在鎮遠縣學署後苗自邛水由金堡狗洞而來者必由之昔曾壘石築門焉小崖山在鎮遠衛故城後苗自施秉鼓樓坡而來者必由此昔副總兵陳寅曾建營于鼓樓坡以戍守之彈子

崖在城四十五里兩山對峙相去數百步左山頂有石如丸右山中虛一竅明透如牖香爐崖在城東上寬下削形若香爐崖上鐫布沂流光四字太和洞在中河山南廣袤丈餘旁有洞深黑不可入亦名南洞中元洞亦名北洞又名東崖洞在城東北寬廣幽邃石竅瓊瓏洞口題黔南第一山內有紫陽書院碑明嘉靖中郡守黃希英建祠祀朱文公于此洞旁爲青龍洞凌元洞在城東五里俗呼七間房背山面河洞廣五丈餘高三丈有奇深二十餘丈洞頂石平如鏡明平播後副將軍陽羨陳龍崖鐫有記序詩詞于

洞頂華崖洞在城西三十里大路旁邃深高爽頂如篆字繚繞百折石乳結成大士像蓮臺華蓋纓絡幡幢畢具旁有石羅漢二內黑暗秉炬而入漸狹則風從中來能滅炬更入丈餘復得空曠日光下照爲水所限不能窮也鎮陽江在府治南一名鎮南江受施秉黃平諸水過城而東流入于沅江亦曰澧水又曰無水漢書稱牂柯無陽縣無水南入沅是也晉宋書作舞陽唐又名武谿又曰巫溪其無水發源之山今水經云源自黃平所謂黃平河水道提綱云源出黃平州南金鳳山舊志亦云出黃平西北三十里之都

四山今考兩山下皆有細水流入西門河當係無水發源之所宛溪在城東十五里焦溪在城西四十里梅溪在城東五十里明史地理志有焦溪關梅溪關松溪在城西南三里牙溪在城西五里小由溪在城西十里勇溪與小由溪相近白水溪在城西三十里鐵溪在城東北三十里出鐵山下自宛溪以下所謂鎮遠九溪也皆入鎮陽江宋咸平中以田承寶爲九溪十洞撫諭都監卽此平甯陂在府西六十三里引水灌田四時不竭雲根五竅泉在府西油榨關崖下有石生五竅泉自竅出小瀑布在城東十里許飛瀑

如練大瀑布在城西六里飛懸崖巔百餘丈鬱爲奇觀
東有鎮東關鐵山關西有鎮西關北有北津關文德
關在城西五里本名油榨關康熙中巡撫王燕易今
名連山阻峽絕壁撐雲鑿石剪荆劣裁容馬十夫當
之萬騎不能越也望雲關在城西二十里相見河之
東其西爲九曲關祝聖橋在城東明巡按劉士正建
迎仙橋在鎮東關前相見橋在城西二十里有大小
二橋宛溪橋在城東十五里鎮安橋在城東北十里
赴思州銅仁者經之通濟橋在城西北赴石阡思南
者經之甘忠果祠在府治雙江吉祥山下康熙十三

年吳逆之變總督甘文焜偕幼子甘國臣殉節于吉
祥寺內古柏二株鐵榦虬枝時興雲氣蓋精靈所結
也後巡撫閻興邦奏請照閩省督臣范承謨之例子
殉難之地建祠致祭乃于寺右立廟焉田畝東在邛
水西在偏橋附近絕少郡所轄五司共成熟田一萬
三千零九畝有奇歲共徵改秋糧米二百八十九石
四斗三升四合地丁改徵米一千一百五十二石七
斗七升七合六勺每石加耗一斗四升皆以備支鎮
標兵糧不敷之數每年由黃平州輓運二千六百一
十三石零五升由施秉縣輓運一百六十六石八斗

零五升又于施秉縣丞花戶內應徵米一百四十石
四斗撥赴府倉交納其鎮標右營遊擊分駐邛水之
兵糧卽撥府屬邛水之花戶應徵米六百二十七石
七斗五升就近赴邛水上納由該縣丞按月支放其
黃平州運府之米內有五百六十八石係由府轉運
銅仁縣由銅仁縣轉運松桃同知者所需運腳歲赴
糧道領給常平倉穀三萬六千零一石一斗邛水縣
丞常平倉穀一萬一千一百八十三石九斗有奇社
倉穀二百石有奇府舊有土同知土通判土推官各
一員今無人承襲現轄土司五偏橋長官司在府西

六十里元至元二十年置偏橋長官司明洪武元年
安源以功授鎮遠府土同知洪武三年改授偏橋長
官司今承襲有印又揚前灘于洪武元年授武烈將
軍二十年改授偏橋左副長官又楊通賽宋時授偏
橋軍民左副長官明永樂二年改副長官今承襲並
無印邛水長官司在府東八十里元置安甯縣尋改
邛水縣洪武五年改置五長官司二十九年並四司
爲邛水十五洞蠻夷長官司授楊昌盛爲正長官袁
誠爲副長官今承襲無印五司地方戶口十倍于昔
編入保甲者偏橋正土司管馬路等共十九寨計民

戶三千零三十有二口一萬一千一百七十有七偏
橋左土司管黃平街等十一寨計民戶九百九十有
一口五千六百二十有三偏橋右土司管沙坪等十
寨計民戶八百六十有九口四千五百六十有六府
屬塘頭哨計民戶一百一十有三口四百八十有三
偏橋左右兩土司所轄苗寨共十有六寨計民戶五
百一十有三口一千六百八十有七功水正副土司
管上下二里十五洞四十八寨計民戶七千七百一
十口四萬七百有二上里邊方苗寨計戶八百九十
有八口四千一百九十府廳州縣各有學學政按臨

合思州銅仁松桃暨郡所轄爲一棚台拱清江附于
府學歲科額取皆二十名武童歲試亦如之建有澧
陽書院義學四駐札鎮標遊擊二員內分防一員都
司一員守備三員內分防二員千總五員內分防二
員把總十二員內分防六員分防玉屏縣汛守備一
員把總一員兵丁一百三十名分防思州府汛千總
一員兵丁一百名分防青谿縣汛把總一員兵丁九
十名分防焦溪相見哨等十一塘兵丁四十三名分
防八弓汛遊擊一員兵丁二百名分防瓦寨汛兵丁
四十一名分防梁上汛把總一員兵丁七十名分防

塘頭哨至盤石等入塘兵丁三十六名分防勝秉汛
守備一員把總一員兵丁一百九十一名分防新城
汛把總一員兵丁四十名分防施秉縣汛千總一員
兵丁一百三十八名鎮遠總兵官駐衛城遊擊一員
都司一員守備一員千總三員把總六員兵丁九百
十名共制兵二千零名鎮遠鎮標轄清江協
副將一員遊擊一員都司一員守備一員千總四員
把總八員外委十二員額外七員額兵一千二百
十名台拱營參將一員守備二員千總四員把總
六員外委十員額外五員額兵八百名天柱

營都司一員千總一員把總二員外委三員額外二
員額兵三百名黃平營都司一員千總一員把總
二員外委三員額外二員額兵三百名場市
所在皆有之產米無幾豐年僅足自贍無年卽藉告
糴地產松柏桐茶杉蠟諸木橡樹尤宜經大吏及有
司勸諭近皆放蠶收繭與遵義同楠竹產于邛水高
者三四丈沿村繞屋翠色連雲郡有東西河三關額
徵銀一萬一千二十六兩有奇居民皆江楚流寓向
稱儉樸掇科第者不乏人而以武略著者尤眾苗有
黑苗犵兜水犵佬崗人四種黑苗族大寨廣男女皆

挽髻向前縮簪戴梳衣服以青爲色男勤耕作種糯穀女子銀花飾首耳垂大環項戴銀圈以多者爲富其所繡布曰苗錦婚姻先唱歌換帶而後聘娶人死則以大木二鋸爲四擇高岡掘深以一木作底旁置兩木昇屍入其中一覆其上掩土深瘞之十三年一祭祖富者以牛貧者以豕羊雞犬水犵狓性淳樸男子薙髮婚姻通媒妁犵狓苗喜逐獸男子薙髮婦女挽髻束花布一條兩端披與肩齊衣蓋膝刺繡于胸袖間昔稱佩刀挾弩之風今久息矣尙人卽土人風俗與漢人同婦女亦漢妝惟足穿草履所織之布曰

尙布細而有文婚葬俱循漢禮恥居苗類稱之以苗則怒目相向云

論曰貴東道所轄六郡惟鎮遠爲適中之區明曾設偏沅巡撫于其地以制諸苗非因其形勢便于指揮歟今自其所屬論之清江台拱據九股生苗之心腹以翼古州施秉黃平總思播平越之樞機以通省會天柱與黎平爲車輔邛水與思州爲藩籬內則四十八溪連松桃之臂指外則三百六灘制辰沅之要害是以思州雖當衝而其地不可以約聚都勻雖扼險而一面不可以肆應縮其轂者莫過于此也說者謂

黔南識略卷十二終
黃平之西門河曾于順治十六年疏鑿以輓楚粟今黔中運鉛者必經四川永甯瀘州放舟岷江歷夔塘巫峽諸險如由黃平之西門河出鎮遠過湖南常德入大江則舟少傾覆之虞而運費亦稍節省惟由畢節陸運至黃平較之至永甯多二百餘里即以舟運之所節省彌陸運之所不敷于公事無所損而領運各官則實受其裨益是說也雖未試行而沅水岷江夷險懸殊則無待智者而後知之惟川運已久未可驟議更張存其說以備採擇可也

黔南識略卷十三

貴州巡撫長白愛必達撰

台拱同知

台拱廳在省城東南四百二十里府南一百二十里明以前爲九股生苗地

國朝雍正十一年平定苗疆建城于台拱寨設同知駐其地其境東至清江通判界烏亮寨五十三里西至都勻府丹江界排養寨四十里南至丹江界欽提寨一百五十里北至黃平州崖門汛界九十里東南至清江雞擺尾汛界六十里西南至丹江崖寨界四十

里東北至施秉縣丞界五十里西北至黃平州寨胆
寨界一百零五里廣一百里袤一百六十里地處萬
山之中百蠻巢穴控制要區城周九百四十二丈高
一丈四尺甃以石門四外關二雍正十一年建臺雄
山在城西南昔皆諸苗盤踞山徑峭仄人跡罕至今
道路開闢可通行旅平蠻坡苗蠻作逆時蟻聚于此
雍正十年討平之因以名坡蓮花壘在西北三十里
絕險峭峙中有微徑如線攀羅援葛而上諸峰森列
宛如蓮朶雍正十一年三月賊築土城于蓮花壘高
二里許廣倍之四面皆深箐提督哈元生移至台拱

屢攻不克至番招親臨其陣分兵六路進攻遂破其
壘十三年二月賊復肆亂謀攻清江各處援兵未至
賊又攻番招汛官兵擊退之賊遂聚集雞擺尾以梗
寨清江台拱大道總兵卜萬年令遊擊姚宅中郎中
瑞各帶所部兵由雞擺尾進援清江兵至交汪不能
前營于蓮花壘越日副將宋朝相領兵赴援賊斷去
路亦登蓮花壘被賊圍困賊知內地乏兵卽乘間四
出大創之後始底定云上設番招汛小江在城西南
其源一出丹江牛皮箐經廳屬之南牛等寨過清江
之雞擺尾汛一出丹江之崖寨經廳屬之羅翁寨繞

城南西北出施洞塘一出丹江之黃茅嶺經廳屬忙
腮等寨並出施河塘又有一源出凱里由廳屬黃施
衛出施洞塘均入于清水江排略寨在城西十五里
爲廳境咽喉雍正十年官兵保據排略副將會長治
領兵往救大破賊火其寨拔營歸台拱賊得據險阻
寨歸路守備高本陽殲焉廳轄兩衛每衛設千總一
員領之台拱衛領十二堡曰德豐曰永安曰覃膏曰
宣教曰慶溥曰寶貢曰來同大堡曰來同小堡曰懷
化大堡曰懷化小堡曰大德大堡曰大德小堡黃施
衛領十堡曰固圍曰通厓曰康衢曰苞桑曰干城曰

松茂曰棠蔭曰道路曰石洞曰湛露共屯軍一千七
百八十六戶田畝從未丈量平苗後以叛苗絕產計
畝分授屯軍每軍授上田六畝中田加二畝下田又
加二畝共田一萬二千四百五十五畝有奇小江一
帶略有平疇無虞水旱南鄉之寶貢大德來同等堡
源深土沃堪稱上田西鄉之覃膏北鄉之固圍湛露
松茂等處山高氣寒最爲瘠薄額徵屯軍糧米一千
九十九石有奇歲納廳倉以作採買供支台拱營糧
照秋成價值交衛千總轉給各堡百戶總小旗工食
餘備藥鉛旗幟等用苗糧定例永免徵收廳倉貯穀

一萬九千八百七十三石九斗有奇又欽奉穀四石
又重農案內歷任正署各員每年捐輸穀二石截至
道光七年止共存貯穀一百五十二石台拱衛屯倉
向貯米三千一百一十七石今惟每軍酌留屯米一
石共存貯米七百四十七石社倉現在貯穀四千零
八十八石七斗屯倉額貯穀四千四百八十二石由
衛弁百戶經管台拱營兵糧每年採買米二千七百
九十石八斗餘徵收兩衛屯米一千零九十九石外
餘一千六百有奇在本境採買供支其價係在糧道
衙門請領不敷之數撥鄰近州縣協濟每年施秉縣

輓運三百石鎮遠縣原輓運米三百三十一石二斗
後因台拱營裁兵五十五名今只運米一百三十一
石二斗軍戶多食晚米苗人惟食糯米城內漢民共
四百三十七戶二千零七十二名口苗寨共一百六
十一計九千八百九十一戶設土千總三人土把總
五人通事十人分管各寨學校未設遇歲科試文武
童生皆附于府義學一廳標向設千總一員兵一百
名又設主簿一員今俱裁城中駐劄台拱營參將一
員守備二員千總四員把總六員外委九員額外五
員兵八百一十名分防稿貢汛千總一員外委一

黑南譜冊卷十三
買兵十九名革東汎千總一員外委一員兵九十四
名番招汎把總一員外委一員兵一百零六名台雄
汎外委一員兵二十九名共設四汎十六塘稿貢土
城周二百九十丈雍正八年建各汎屯俱有土城無
驛遞設六鋪鋪夫二十六名渡口二城東南一革東
一均設有船由番隴羊遼等塘東至清江朗洞古州
西通丹江凱里清平北達勝秉鎮遠黃平俱爲通衢
東歷頭台二台至番招入清江之烏潤徑路稍僻集
場以六日爲期鉛廠歸清平縣管理地多杉樹苗惟
九股苗與黑苗同類相傳漢武侯南征戮其種殆盡

餘九人散處蔓延分而爲九因名九股近丹江者曰
上九股近施秉者曰下九股地曠族繁性尤剽悍明
季播州之亂爲楊應龍黨與後應龍滅而九股未勦
伏莽劫掠累世不悛雍正六年總督鄂爾泰巡撫張
廣泗平定八寨丹江七年開清江九年古州上下江
悉平而九股梗化如故先是七年春總督鄂爾泰檄
鎮遠知府方顯領兵招撫九股羣苗皆俯首聽命以
台拱上爲丹江聲援下與清江犄角而施秉鎮遠之
藩籬以固議建城設兵以鎮撫之十年秋總督高其
倬巡撫元展成會檄按察司方顯董其事苗僞恭順

黔南雜記卷十三
五十二
日夜刈獲及農工畢城築數板而叛十一年提督哈
元生領楚粵兵討平之十三年賊自古州二嶺營戰
遁圍攻台拱地方道路阻塞官兵不能策應因子蓮
花屯數月間賊陷清平黃平餘慶青溪等州縣焚掠
鎮遠思州二府村寨猝難制伏猖獗愈甚是年十月
張廣泗經略軍務以賊首聚集九股清江之間分兵
三路進攻遣副將壽長等勦上九股等寨總兵王無
黨等勦下九股等寨副將軍董芳親駐清江率兵進
勦遣已而三路皆捷台拱清江既克以次勦平丹江
古州等處迄乾隆之元年冬軍務告竣計諸苗之頑

梗反覆未有如九股者也自大創後鎗刀器械悉已
繳獻如稿貢打革台盤排咱台雄革東望甫番招諸
要隘皆叛苗向據以爲固者今則屯汛相聯宿兵守
禦無敢有伏莽者矣內轄旣久蠻俗漸更今男子多
有漢裝者婦女短裙窄袖耳環大徑二三寸項帶大
銀圈插簪長尺計不知文字用木刻爲信傭作者多
易爲盜其通漢語者謂之通事官則置爲寨頭有訟
獄應勘問者必寨頭傳語而後官始悉其情否則難
以言喻也然則寨頭之設烏可不慎其人哉
清江通判

清江廳在省城東六百四十里府治西南一百九十里明以前爲化外生苗及黎平赤溪瀟洞長官司地國朝雍正七年平定苗疆後以公鷺寨據清江形勝建城設同知駐其地旋以同知移駐台拱改設通判其境東至黎平府開泰縣屬苗光寨界一百二十五里西至台拱屬革東寨適中之接勞亭七十里南至黎平府古州屬苗蒿寨一百一十五里北至鎮遠縣抱金界一百五里東南至黎平府屬黃寨界一百三十里西南至丹江屬羊桃寨界一百一十五里東北至鎮遠縣界一百二十五里西北至鎮遠縣屬鉸容寨

界一百一十五里廣一百六十三里袤一百五十六里憑深據險巖疆重地城周三里八分計九百四十六丈高一丈四尺門四水關二公鷺山在城南形勢巍峩垣墉森列前爲苗人盤踞平定後建城其上柳羅山在城東北十里聳峙江濱爲羣苗出入之要隘水陸之最衝雍正七年知府方顯副將張禹謨領兵招撫駐柳羅羣苗爭先降附惟江外公鷺苗與柳利雞擺尾等十餘寨連結漢奸嗾之潛渡江攻官兵巡撫張廣泗進勦賊詭言投誠爲緩兵計廣泗佯許之賊防守果懈夜半濟師直搗之遂進據其寨次日薄暮

廣泗令眾兵伏要隘空大營以待二鼓賊銜枚逼大營無所遇急反走不數武四面炮聲震地火光燭天前後夾擊賊死無算越明日賊縛漢奸曹文登以獻皆受撫廣泗乃進古州十三年賊圍清江北岸之柳羅營副將會長治等力禦之被困逾半載揚威將軍哈元生飭副將柳定國等進勦會長治亦發兵夾擊柳羅圍解清江始通東山在公鶯之東山半懸流陡注望如飛練擺尾山在城西三十里險峻峭峙冠于諸山又有歹濃山雍正十三年總兵焦應林議搗雞擺尾賊渠督兵至歹濃山燬其營壘二十餘所破雞

右上中下數寨遂擊雞擺尾賊乃遁逃三關口在城西五里沿河兩山屹立極為險峻雍正十三年副將馬成林率兵勦雞擺尾賊築城于三關口成林潛兵襲之連奪二城賊遁鳥飛洞在東兜下絕壁間開闢江路時石上鐫有安瀾二字清水江在城東北發源于都勻經麻哈州之甕城清平縣之凱里黃平州之崖門司施秉縣之下秉諸處有凱里河平定河雞賈河長河劍河馬尾河諸名下至廳界之稿貢汎北又經廳城北又東至柳霽汎至黎平府之王寨又東北至天柱縣之甕東入湖南黔陽縣南會于沅水舊陷

苗境舟楫未通雍正七年總督鄂爾泰巡撫張廣泗始開新疆題請開濬自都勻府至黔陽一千一百二十餘里舟行無阻今稱便焉烏陽河源于鎮遠府東禾山至松喬堡入廳境下至南高寨入清水江烏孟河源于古州之高陽寨至皆里入廳境至南嘉堡會展牙溪水合流南孟寨入清水江烏沙河一源于丹江之牛皮箐至台賴入廳境一源于古州之陽舍山曰烏擁河至旁洞入廳境一源于朗洞之者林山曰烏拉河至南哨會烏擁烏蔑兩河三水合流至下格東總名曰烏沙河入清水江又有八卦河由天柱縣

界逕黎平之黃寨達清水江田畝自平苗後平衍之區安屯設衛餘皆苗民開懇未經丈量升科無畝可計惟赤溪岑戈等寨漢民有田二百四十三畝零額徵丁銀十七兩一錢有奇秋米二十二石八斗有奇改徵米一十九石有奇耗銀五兩一錢有奇左右兩衛每衛設千總一員左衛轄十一堡章聖堡城周二百三十丈上下德阜二堡上堡城八十丈下堡城一百八十丈九儀堡城二百二十丈柳金堡城二百四十丈宣號堡城二百五十丈繞慶堡城二百一十丈新柳堡城三百四十丈汪澤堡城一百九十丈天培

黑西諸田卷十三
九
堡城二百一十丈南嘉堡城二百二十一丈計安屯
軍九百四十一戶右衛轄十一堡嘉年堡城二百八
十一丈萬安堡城一百二十九丈鎮門堡城一百七
十五丈松喬堡城三百一十五丈南金堡城一百五
十四丈白列堡城三百八十九丈柳蔭堡城三百五
十丈順安堡城一百二十六丈玉梁堡城一百丈培
養堡城二百丈觀摩城二百九丈計安屯軍九百七
十七戶各堡皆係土城屯田計一萬七百四十八畝
零屯糧每戶額徵米六斗廳倉額貯米一萬七千九
百零六石六斗有奇內左衛分貯米二千九百四十

三石右衛分貯米二千九百三十一石乾隆間奉文
全數易穀緣本地產穀甚少鄰境亦難採辦是以歷
任交倉仍係照米數盤量溢額穀一百零九石九斗
有奇欽奉重農穀三十八石左衛存社穀八千九百
十三石三斗有奇酌留穀二千一百五十六石七斗
有奇右衛存社穀九千三百九十六石六斗有奇酌
留穀二千二百九十四石五斗有奇歲收都勻府輓
運兵米一千二百三十五石麻哈州運七百二十二
石清平縣運七百一十四石天柱縣運一千一十九
石九斗一升共收兵米三千七百石九斗零內轉運

朗洞營及分防柳拉汎兵米七百九十石七斗有奇
柳霽汎兵米六百一十五石九斗有奇白索雞擺尾
二汎兵米六百三十七石有奇領運腳價口袋斗級
工食等銀七百一十八兩八錢有奇所需兵糧卽于
二項內支給義倉七共貯穀三千四百六十石均有
倉正首事管理學額附鎮遠府考試取進無額數柳
川書院乾隆五十六年建土千總六員土把總七員
二舍一員惟赤溪涵洞係明洪武五年授土酋吳世
銘爲赤溪涵洞蠻夷長官司屬思州宣慰司永樂七
年以楊通諒爲正長官而吳氏副之十一年屬新化

府宣德九年府廢屬黎平府

國朝乾隆元年給委世襲土千總餘均係雍正乾隆年
間給授外設通事十三名分管苗民一百七十七寨
天柱縣丞分駐柳霽係廳地城中駐劄副將一員都
司一員千總二員把總六員外委額外外委各五員
兵丁六百十名左營分防白索汎土城二百五
十三丈守備一員把總一員外委二員額外外委二
員兵丁二百零七名雞擺尾汎土城一百四十丈千
總一員外委一員兵丁九十四名東嶺汎土城八十
丈外委一員兵丁二十九名右營分防柳霽汎石城

黑南諸冊卷十三
三百四十丈遊擊一員千總一員外委二員額外外
委一員兵丁二百九十四名柳受汎土城一百三十
八丈外委一員兵丁三十七名設一十三鋪號書二
十六名鋪夫二十八名場市四各有定期趁集城外
渡口一東北大路通鎮遠東南大路至古州西北大
路至台拱東北大路至柳霽涵洞司天柱營樹多松
杉往時苗人未習種杉近亦效爲之放木筏順流而
下獲利甚厚廳本黑苗地向稱頑梗雍正七年巡撫
張廣泗以八寨丹江旣平而清江以上下九股爲門
戶丹江八寨爲藩籬與施秉舊縣接壤不卽清理率

爲邊氓害先後討平之今所屬多黑苗惟雞寨旁洞
等六七寨有白苗又赤溪涵洞所轄均係洞苗黑苗
多蓄髮尙鬼不信醫藥俗尙鬪牛先以重賞購大牛
飯之使肥屆冬則擇日各牽牛出鬪十百爲羣奔騰
跳擲必勝負分然後止勝者挂紅帛于牛角牽至祭
所吹笙置酒以爲樂不勝者宰牛分食之婚姻先唱
歌跳月然後聘白苗習俗亦陋洞苗習華風編姓氏
婦女有改漢裝者多與軍聯姻云

黔南識略卷十三終

